



MINORITY SHAREHOLDER WATCHDOG GROUP

Badan Pengawas Pemegang Saham Minoriti Berhad

Incorporated in Malaysia * Company No. 524898-M

The Observer

08.04.2016

KEMAS KINI PASARAN MODAL

RANG UNDANG-UNDANG SYARIKAT 2015 DILULUSKAN DENGAN PINDAAN

KOMEN MSWG:

Ada beberapa perubahan ketara yang dijangka akan memudahkan dan mengubah lanskap perniagaan di Malaysia dengan pengenalan rang undang-undang syarikat baru 2015 menggantikan Akta Syarikat 1965 yang sedia ada seperti berikut:

- Pembentukan syarikat: Membenarkan sesebuah syarikat (iaitu syarikat swasta) dibentuk oleh seorang individu, iaitu seorang pemegang saham dan individu itu boleh menjadi pengarah tunggal syarikat [dan bukannya dua pengarah seperti yang sedia ada]. Ini bermakna secara teori, sebuah syarikat dengan seorang pengarah atau seorang pemegang saham akan dilindungi oleh undang-undang entiti sah berasingan, tidak seperti perniagaan milikan tunggal;
- Mesyuarat Agung Tahunan (AGM) tidak akan diwajibkan bagi syarikat swasta, namun syarikat awam masih perlu mengadakan AGM. Pelaksanaan keputusan untuk syarikat swasta boleh lakukan dengan resolusi bertulis kecuali dalam kes penyingkiran pengarah dan juruaudit tetapi syarikat awam di bawah rang undang-undang baru tidak boleh lagi mengeluarkan resolusi pekeliling;
- Juruaudit syarikat awam masih perlu menghadiri AGM, manakala juruaudit syarikat swasta hanya perlu berbuat demikian sekiranya diminta oleh Lembaga Pengarah;
- Di bawah rang undang-undang baru, perakuan pemerbadanan tidak akan diterbitkan lagi sewaktu penubuhan syarikat. Sebaliknya, SSM akan mengeluarkan notis pendaftaran yang menjadi bukti muktamad syarikat itu sudah didaftarkan dengan sewajarnya. Perakuan pemerbadanan hanya akan dikeluarkan sekiranya ada permohonan dibuat dan dengan membayar fi yang ditetapkan;
- Memorandum dan tataurus syarikat akan digantikan dengan dokumen yang dikenali sebagai perlembagaan di bawah rang undang-undang baru. Sesebuah syarikat boleh memilih untuk tidak menerima pakai perlembagaan ini, yang mengandungi hak, kuasa, kewajipan dan tanggungjawab pengarah dan ahli;
- Demi melindungi pihak ketiga yang akan menjalankan perniagaan dengan syarikat itu, suatu akuan berkanun untuk pelaksanaan prosedur korporat yang melibatkan pengurangan modal,

pembelian balik saham, bantuan kewangan dan pembayaran dividen, perlu ditandatangani oleh lembaga pengarah terlebih dahulu untuk mengesahkan sama ada syarikat itu usaha berterusan dan mampu bayar dari segi kewangan. Pelanggaran pengisytiharan itu mungkin menjadi perbuatan jenayah;

- Dalam pelan penstrukturkan semula hutang, sesebuah syarikat yang diberi pilihan untuk memohon penyusunan sukarela korporat dengan melantik pentadbir bebas, perlu mengesahkan keupayaan dan daya maju syarikat sebelum memasuki skim penyusunan berkenaan. Kelulusan perjanjian itu ialah sebanyak 75% daripada pembiutang yang akan mengikat pembiutang lain;
- Pertukaran kepada rejim bukan nilai tara; dan
- Laporan Pengarah akan diseragamkan dan perlu mengandungi perkara seperti yang dinyatakan di dalam Jadual 5 Rang Undang-Undang.

Memandangkan kami masih lagi meneliti butiran Rang Undang-Undang baru ini, kami akan memaklumkan perubahan dari semasa ke semasa.

PANDANGAN RINGKAS MSWG MENGENAI TRANSAKSI KORPORAT SEMASA

SONA PETROLEUM BERHAD (“SONA PETROLEUM”)

Lembaga Pengarah Sona Petroleum mengumumkan Mesyuarat Agung Luar Biasa (“EGM”) yang sepatutnya diadakan pada 30 Mac 2016 ditangguhkan kepada tarikh lain yang akan diumumkan, iaitu suatu tarikh yang tidak melebihi 30 hari dari 30 Mac 2016.

Oleh itu, Lembaga Pengarah akan membuat pengumuman yang diperlukan berkaitan masa dan tempat EGM yang ditangguhkan itu dalam masa terdekat.

Cadangan Sona Petroleum melibatkan pengambilalihan Stag Oilfield di luar pesisir Australia Barat dengan balasan kira-kira RM103.2 juta. Penasihat utama pengambilalihan ialah CIMB Investment Bank Berhad dan Penilai Aset Bebas ialah Gaffney, Cline & Associates (“GCA”).

[Sumber: Pengumuman Sona Petroleum di laman web Bursa Malaysia pada 30 Mac 2016]

KOMEN MSWG:

Oleh kerana ada perbezaan pendapat mengenai harga aset berkelayakan, EGM pada 30 Mac 2016 telah ditangguhkan berikutan bantahan daripada pemegang saham.

MSWG telah dijemput untuk memberi sedikit penjelasan kepada pemegang saham minoriti mengenai peraturan SC berhubung penyenaraian syarikat SPAC. Kami akan cuba untuk memberi penerangan yang mudah mengenai apa yang dimaksudkan dengan SPAC dan risiko yang terlibat bagi pelabur.

- (i) SPAC atau Syarikat Pengambilalihan Tujuan Khas tidak mempunyai operasi atau perniagaan yang menjana pendapatan pada waktu IPO. Dana boleh diperoleh melalui IPO daripada orang ramai bagi pengambilalihan yang tidak ditentukan dalam industri yang disasarkan. Dalam kes ini, Sona Petroleum merupakan SPAC dalam industri minyak dan gas.
- (ii) Pelabur dalam SPAC biasanya akan membeli unit saham atau waran dan unit ini boleh dijual beli dalam bursa sebelum pemerolehan mana-mana aset layak.

- (iii) SPAC perlu meletakkan sekurang-kurangnya 90% daripada hasil IPO ke dalam akaun amanah. Ini bertujuan melindungi pelabur.
- (iv) SPAC perlu menggunakan sehingga 90% daripada dana untuk pengambilalihan berkelayakan (QA) dalam tempoh 36 bulan daripada IPO. Sekiranya tiada pengambilalihan berkelayakan dalam tempoh yang ditetapkan, wang perlu dikembalikan kepada pelabur.
- (v) Pengambilalihan berkelayakan perlu diluluskan di EGM oleh majoriti ahli dari segi bilangan dan 75% dari segi nilai.
- (vi) EGM yang ditangguhkan adalah untuk membuat keputusan mengenai aset layak iaitu Stag Oilfield di Australia Barat. Penilaian yang dibuat oleh Jurunilai Bebas, GCA pada Januari 2016 ialah antara AS\$30 juta hingga AS\$40 juta. Harga yang dinyatakan bagi aset berkelayakan pada Julai 2015 ialah AS\$25 juta.
- (vii) Untuk makluman, Sona Petroleum disenaraikan pada 30 Julai 2013 selepas IPO dan tempoh 3 tahun akan tamat pada 30 Julai 2016. Ini bermakna Sona Petroleum perlu mengembalikan dana kepada pemegang saham sekiranya pengambilalihan berkelayakan ini tidak berlaku.
- (viii) Dalam kes ini, pemegang saham tidak selesa dengan harga dan merasakan syarikat itu perlu berunding untuk mendapatkan harga dan syarat yang lebih baik.
- Hak mencarigali aset berkelayakan akan tamat pada Ogos 2018. Oleh itu, adalah wajar syarikat menangguhkan EGM dan pengambilalihan berkelayakan ini untuk memberi lebih banyak masa kepada pemegang saham untuk memahami dan mempertimbangkan meritnya.
- (ix) Mengikut peraturan, pemegang saham yang membantah boleh mendapatkan semula pelaburan mereka daripada kumpulan wang amanah itu pada asas pro-rata.
- (x) Ini bermakna dana awal pelabur masih dilindungi, ditolak nilai masa wang dan beberapa perbelanjaan mengurus.
- Pemegang saham perlu membuat keputusan sama ada mereka bersetuju dengan pemerolehan aset berkelayakan oleh Sona Petroleum.

Penganalisa MSWG

Lya Rahman, Pengurus Besar, Khidmat Korporat, lyarahman@mswg.org.my
Rebecca Yap, Ketua, Pemantauan Korporat rebecca.yap@mswg.org.my
Quah Ban Aik, Ketua, Pemantauan Korporat banaik.quah@mswg.org.my
Norhisam Sidek, Pengurus, Pemantauan Korporat norhisam@mswg.org.my
Lee Chee Meng, Pengurus, Pemantauan Korporat cheemeng@mswg.org.my
Wong Kin Wing, Pengurus, Pemantauan Korporat, kinwing@mswg.org.my
Hoo Ley Beng, Pengurus, Pemantauan Korporat linnert.hoo@mswg.org.my
Nor Khalidah Khalil, Penganalisa, Pemantauan Korporat khalidah@mswg.org.my
Vinodth Ramasamy, Penganalisa, Pemantauan Korporat vinodth.ram@mswg.org.my

PENZAHIRAN KEPENTINGAN

- *Sehubungan dengan syarikat-syarikat yang dinyatakan, MSWG memegang jumlah saham yang minima di dalam syarikat-syarikat yang dinyatakan di dalam surat berita ini kecuali bagi Sona Petroleum Berhad.*
-

Maklumbalas

Kami mengalu-alukan maklumbalas anda mengenai surat berita dan khidmat kami. Sila e-mel komen dan cadangan anda ke mswg.ceo@mswg.org.my.

PENOLAKAN TUNTUTAN

Surat berita ini dan isi kandungannya berserta semua hak-hak berkaitan dengannya termasuk hak cipta dimiliki oleh Badan Pengawas Pemegang Saham Minoriti Berhad, juga dikenali sebagai Minority Shareholder Watchdog Group (MSWG).

Isi kandungan dan pendapat yang dinyatakan di dalam surat berita ini adalah berdasarkan maklumat yang diperoleh daripada domain awam dan bertujuan untuk memberikan maklumat umum kepada pengguna dan adalah untuk rujukan sahaja. Usaha terbaik telah dilakukan untuk memastikan maklumat yang terkandung di dalam surat berita ini adalah tepat dan terkini pada tarikh penerbitan. Walaubagaimanapun, MSWG tidak membuat sebarang waranti nyata atau tersirat atas ketepatan atau kelengkapan maklumat dan pendapat yang terkandung di dalam surat berita ini. Tiada maklumat di dalam surat berita ini yang bertujuan atau patut dianggap sebagai syor untuk membeli atau menjual atau jemputan untuk melanggar sekuriti tertentu, pelaburan yang berkaitan atau mana-mana instrumen kewangan.

MSWG perlu diberikan perakuan bagi mana-mana bahagian surat berita ini yang diterbitkan semula.

MSWG tidak akan bertanggungjawab atau menanggung sebarang liabiliti atas kebergantungan kepada sebarang maklumat atau komen yang terkandung di dalam surat berita ini atau jika ianya diterbitkan semula oleh pihak ketiga. Semua pembaca atau pelabur dinasihatkan supaya mendapatkan nasihat perundangan atau nasihat profesional yang lain sebelum mengambil sebarang tindakan berdasarkan surat berita ini.